

Visoki predstavnik imenovao novog šefa ureda OHR-a u Mostaru (Jug)

Visoki predstavnik, Wolfgang Petritsch, imenovao je gospodina Jean-Pierre Berçota na poziciju zamjenika Visokog predstavnika i šefa OHR-ovog ureda u Mostaru. Gospodin Berçot rođen je 1947. godine u Vijetnamu (Hanoj). Oženjen je i ima dvoje odrasle djece.

Gospodin Berçot je diplomirao na vojnoj akademiji Saint-Cyr-Coëtquidan u Francuskoj i 1985. godine je započeo raditi u Ministarstvu vanjskih poslova Francuske (Quai d'Orsay).

Gospodin Berçot je vršio dužnost zamjenika šefa misije u Madagaskaru, Komorskim ostrvima, Libanonu, Maliju, Burundiju i Kolumbiji. Na svakoj od ovih funkcija gospodin Berçot bio je zadužen za izgradnju institucija i razvojne programe za ove zemlje.

U periodu od 1994. do 1996. godine gospodin Berçot je također vršio dužnost viceguvernera u francuskoj provinciji Eure-et-Loir, gdje je bio zadužen za koordinaciju ekonomskih i socijalnih inicijativa vezanih za privredni razvoj. Osim toga, vodio je računa o tome da sve zakonske i regulatorne procedure donošenja odluka od strane općina budu u skladu sa važećim francuskim zakonima.

Gospodin Berçot dolazi iz New Yorka, gdje je radio u političkom odjelu, koji se bavio i pitanjima vezanim za jugoistočnu Evropu, pri francuskoj misiji u Ujedinjenim narodima. Visoki predstavnik izražava dobrodošlicu gospodinu Berçotu i želi mu uspjeh u ovom zahtjevnom poslu. Ured Visokog predstavnika će i dalje pružati punu podršku OHR-ovom regionalnom uredu u Mostaru, na čijem čelu se sada nalazi gospodin Jean-Pierre Berçot.

Visoki predstavnik takođe izražava zahvalnost ambasadoru Colinu Munrou, bivšem šefu OHR-ovog ureda u Mostaru, za njegovu opredjeljenost i predanost provedbi Daytonskog mirovnog sporazuma za dobrobit svih građana Mostara i Hercegovine.

Za vrijeme mandata ambasadora Munroa, OHR je postigao značajan napredak po određenom broju pitanja uključujući i usvajanje Zakona o izmjenama i dopunama Zakona o unutarnjim poslovima od strane Vlade Hercegovačko-neretvanskog kantona. Ambasador Munro se zalagao za pozitivan razvoj događaja u vezi sa obnovom džamije u Stocu, kao i uspostavi stare mostarske Gimnazije kao multietničke škole. Zahvaljući njegovim naporima bošnjačka djeca iz Stoca više ne moraju putovati u Mostar kako bi pohađala školu. Također je odigrao važnu ulogu u zaključivanju Regionalnog memoranduma o razumjevanju o zaštiti od požara između Hrvatske, BiH i SFOR-a. Rezultati ambasadora Munroa su ostvareni usprkos ozbiljnim izazovima protuustavne "hrvatske samouprave", organiziranim protestima u aprilu vezanim za Hercegovačku banku, te sistematskim obstrukcijama koje su u jednom periodu onemogućile funkcioniranje Vlade Kantona 7.